

«Ei vegn engulau fetg pauc»

En stizuns da menaschis purils ella Bassa vegn engulau dabia e per entginas ei quei perfin in motiv da serrar las portas per adina. En Surselva ei la situaziun megliaera, almeins a Dieni, Segnas e Mompé Medel.

SUSI ROTHMUND/FMR

Sco la gassetta Schweizer Bauer ha rapportau la mesjamna vargada, vegn ei adina puspei engulau en stizuns da menaschis purils ella Bassa nua che la clientella po survir sesezza. Laderas e laders engolan daners ord la cassa ni prendan rauba senza pagar. La FMR ha vuliu saver co ei vesa ora en Surselva e dumandau possessurs da stizunettas a Mompé Medel, Dieni/Sedrun e Segnas sch'ei vegni era engulau ord lur stizuns. Sco las puras ed ils purs han detg vegn ei per fortuna denton engulau fetg pauc.

Pegliau ils laders

La stizunetta dalla famiglia *Manetsch* a Mompé Medel vegn oravontut frequentada da passants e hosps da vacanzas. Sco *Armin Manetsch* di, constetti la cassa buc adina il davos temps. El ha remarcau ch'igl ei vegniu empau mender il davos miez onn. Tuttina manegia el ch'ei vegni buc engulau bia. Tscheu e leu mondi la cassa buca si per enzacons francs – ina ga muncavien era 30 francs – mo ch'ei vegnessi veramein engulau regularmeins savessi el buca dir. Ei seigi denton era buca sempel da controllar mintga di cun tut igl inventar ch'ei hagian en stizun.

Questa stad hagi el observau ina gruppa da giuvenils che sedepurtavi suspectus ed informau la polizia. Quella hagi pudiu tier ils giuvenils alla staziun a Mustér. «Ensemen culla polizia havein nus pli tard discurrei culs giuvenils e confruntau els cun gl'enguladetsch. Cun excepziun d'in scolar ein tuts stai mal da quei ch'ei han fatg. Quei ei stau la megliaera terapia, megliaer che da far pagar in detg castitg», di *Armin Manetsch*. El enconuscha denton purs ella Bassa che han stuii calar cun lur stizun perquei ch'ei vegnevi engulau aschi bia.

Giu cletg

Era culla famiglia *Berther* – che posseda la Stizunetta a Dieni ella val Tujetsch – va ei semeigliant sco culla famiglia *Manetsch*. «Ei vegn buca naven bia», di *Cornelia Berther* e manegia d'haver giu dabia cletg entochen ussa. Ella Stizunetta sa la clientella pagar cun Twint ni bar. Tenor *Berther* ei la cassa aunc mai vegnida rutta si e grondas summas hagian mai muncau. Forsa hagi quei era da far empau cul fatg che la Stizunetta sesanfli gest sper casa ed ei hagian quella en egl, sch'ei mirien da finiastra ora. Per gl'auter hagian ei buc exnum signalisau bein aschia che buca mintgin vesi ch'ei hagi a Dieni quella stizun. Ina segirada encunter enguladetschs hagian ei buca fatg. Sch'ei vegnessi engulau fetg bia, serassien ei probablamein la Stizunetta ni arvesien mo certas uras e cun survir la clientella. «Ei fuss aviert bia pli pauc e la



Ella cassa dalla stizunetta a Mompé Medel tier la famiglia *Manetsch* maunchi enqualga enzacons francs, denton buc savens.

MAD

clientella che fa lur cumpras la fin d'jamna muncass», suppona *Cornelia Berther*. Sin ella spetga il proxim temps massa lavur, mo la dunna selegra. La famiglia *Berther* ha numnadamein baghegiu casa e prest po la flurista endrizzar sia Stizunetta en casa nova.

Ei scalina en stizun ed a casa

Sil bein puril da bio *Salez* a Segnas posseda la famiglia *Bucheli-Caduff* ina stizunetta nua che la clientella po survir sesezza e pagar bar ni cun Twint. «Nus essan fetg, fetg cuntents. Enguladetschs ein aunc mai stai in tema tier

nus», selegra *Silvia Bucheli-Caduff*. Tscheu e leu hagi la clientella forsa buca gest giu ils daners necessaris en sac, mo quei seigi buc in problem. Ei laschian lu anavos in cedel cun ina notizia ch'ei portien ils daners l'auter di. Ei hagi era dau tals che hagian tarmess quei che muncavi culla posta. «Nus serrein sur notg e pil di ora fa il scalin automatic vid igl ésch in bien survetsch. Quel avertescha nus cu enzatgi entra ella stizun. Il scalin aud'ins leu ed en nossa casa», declara la pura. Quei possi decuraschar persunas che schessien forsa svanir enzatgei sch'ei havessien il sentiment ch'ei vegni buc controllau.

Adina puspei denunziat

Tenor *Markus Walser*, il plidader da medias dalla Polizia cantunala dil Grischun, po quella buca evaluar specificamein enguladetschs en stizuns da survir sesez sin beins purils. Ella registratura possien ei sulet encurir ladernetschs, ladernetschs clandestins ed aschia vinavon. In enguladetsch en ina stizunetta sil bein puril seigi buc in fatg per sesez ed aschia possien quels era buca vegnir evaluai. Ei possien denton confirmar, che possessuras e possessurs da stizuns sin beins purils fetschien adina puspei denunziat

d'enguladetschs tier la Polizia cantunala dil Grischun.

Videosurveglianza

Ina videosurveglianza egl intern d'ina stizun sil bein puril ei lubida cun risguardar las prescripziuns corrispundentas e cun far in avis corrispundent. Las registraziuns astgan lu era vegnir messas a disposiziun alla polizia per eruir ils delinquents. Ina videosurveglianza dil spazi public entras persunas privatas ei denton da principi buca lubida.